



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

學校名稱 : 香港耀能協會賽馬會田綺玲學校
Name of School : SAHK JOCKEY CLUB ELAINE FIELD SCHOOL
劇名 Name of Play : 看見
劇作者 Script writer : 馬漢銘(老師)、何浩源(導師)

故事大綱 Synopsis :

杜杜熱愛跑步，但因患有肌肉萎縮症被迫放棄。而同時間杜杜爸爸患上肺癌要去醫病，於是安排杜杜入住特殊學校宿舍。杜杜爸爸因病危所以未能與杜杜聯絡，於是杜杜決定自殺。幸得阿堅拯救，並邀請他到生命藝團。杜杜在藝團認識了視障的欣欣同學，並發掘到自己的音樂天份，最後.....杜杜能發揮自己的音樂天份嗎？杜杜爸爸能戰勝癌症嗎？父子會團聚嗎？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

杜 (看著觀眾) 大家好！我叫杜杜，今年 20 歲。

(看見小杜杜正在跑步。)

杜 (看著觀眾) 小學一年班開始我就好鍾意跑步，小學三年班我第一次參加 200 公尺跑步比賽，仲入咗決賽。

VO 小三組別 200 公尺跑步決賽即將開始。On your mark, get set. BEEP!

(小杜杜開始跑步比賽)

All 加油加油！杜杜加油！加油加油！杜杜加油！

(衝線，小杜杜勇奪冠軍。)

眾(VO) 好嘢！

杜 (看著觀眾) 我攞咗好多次跑步冠軍之後，有一日，教練嚟同我講。

田徑教練 (台左出) 杜杜，嚟緊要預備學界田徑精英賽嘅賽事，要再加緊練習呀！

小杜 收到，教練。

(MUSIC : gonna fly now)

(小杜杜在台上，由左跑去右，又由右跑去左，音樂漸慢，慢動作跑步.....跌倒！然後看見小杜杜爸爸推著輪椅出場面向觀眾。)

醫生 杜生，你個仔嘅報告啱啱出咗，杜杜患有先天性嘅肌肉萎縮症，佢今次跌低，好大機會以後都企唔返起身，體能會漸漸退化，要用輪椅代步。

(杜杜爸爸扶起小杜杜坐在輪椅上。)

Background MUSIC : 絕症 in

小杜 爸爸，我以後係咪唔可以再跑步，甚至要一世坐喺輪椅？

杜爸 杜杜，你有左呢個病，以後就唔可以再跑步。我哋要樂觀啲保持希望，而家醫學越嚟越發達，可能將來有一隻藥出現，你會唔使再坐輪椅㗎。爸爸會更加努力工作，買最好嘅藥去幫你。而家咩都唔好諗喇，爸爸推你入房休息下先。

(爸爸推小杜杜入房，然後留在台上)

杜 跟住嗰幾年，爸爸都好努力做嘢。(強哥及導演出現在舞台)

杜爸 強哥強哥，你叫我整嘅道具我提早兩日整好咗喇。

強哥 勁嘞，導演你睇下。

導演 唔得唔得，再整過，整大一倍。

杜爸 得得得冇問題。呀係呀強哥。導演你好！我個仔病咗要好多醫藥費，我最近等錢洗，如果有咩嘢要整即管搵我，保證做到你哋滿意為止。仲有如果需要場務啲擔擔抬抬嘅工作或者任何崗位我都可以㗎。有 job 記得搵我，多謝多謝！



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

強哥 得啦得啦，有嘢即刻搵你。

杜爸 多謝強哥！多謝導演！

(Background MUSIC fade out) (失意：前奏)

杜 *(向觀眾) 雖然過咗好耐，但係我成日都好掛住細個跑步擺獎好開心嘅感覺。*

(MUSIC in, 杜杜、杜爸 合唱「失意」)

杜 可知道，在昨天，我與理想咫尺望見，
無論我點樣努力，點樣堅持，
我也注定與失敗並肩。

(杜爸) 可知道，在昨天，你與理想咫尺望見，
無奈你得到這病，這種心情.....

(杜) 夢想？我想過就算！

副歌：

(杜) 人活著沒希望，我感到困倦，
迷惘、懊悔與失意。

(杜爸) 但願今後能迎難而上，
嘗試，重新找出發點！

(杜) 天知道，在這天，我與理想咫尺望見，
難道我可以重拾昨日激情？
我哪能面對挑戰？

副歌：

(杜) 人活著沒希望，我感到困倦，
迷惘、懊悔與失意。

(杜爸) 或在今後，會有新的開始，
嘗試，重拾生存意志！
嘗試，燃亮心中鬥志！

杜爸 杜杜，我哋要面對現實，你諗下仲有啲咩興趣可以去發揮？

杜

杜爸 我記得細個生日會，啲親戚朋友成日圍住你唱歌跳舞，你仲記唔記得先？

音樂「叮噠」入

(叮噠音樂入，親戚朋友圍住小杜杜唱歌。)

(杜爸拿着蛋糕，所有人唱生日歌。)



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

杜爸 杜杜，生日快樂，快 d 許個願先！
小杜 我想代表香港參加奧運，我要參加全民造星！
親友 你要參加全民造星？你有冇姜濤咁靚仔先？
小杜 我直頭靚仔過姜濤啦！
杜爸 係呀！我個仔梗係靚仔過姜濤啦！

(回到現實時空。)

杜爸 記唔記得呀？你細個好鍾意唱歌，又鍾意二次創作啲歌詞添。

杜

杜爸 爸爸最近好努力搵錢，遲啲出嚟同你去報唱歌班。

杜 哦。

(杜爸咳嗽聲)

杜 阿爸你有嘢咩？

杜爸 冇事冇事，爸爸可能最近忙得滯所以瞓得唔夠，有幾聲咳啫。

杜 有冇睇醫生呀？

杜爸 幾聲咳唔使啦。

(音樂入)

醫生 杜生，份報告出咗啦。請你有心理準備，你患嘅係末期肺癌，我建議你立刻入院做電療同化療，如果唔係，捱唔到三個月。

MUSIC in (杜爸唱)

這一個消息，怎能接受？

此刻我心慌亂。

這一個消息，實太震撼，

我也不知怎算！

副歌：

人生幻變，我不知怎算！

人生幻變，我可以點算！

我看著窗邊，只有淚與恨，

我為何咁不幸？

我過著單親生活太傷感，

老天你如何待人？



IMPORTANT NOTE 重要告示:

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

副歌：

媽媽已離開了，爸爸也患癌了，

你也受著皮肉之痛，我心就像割開了！

杜爸 杜杜，爸爸接咗份 job，要去大陸拍戲大約半年，呢段時間我幫你申請咗賽馬會嘅宿舍同學校，你放心啦，間學校好好架，我知道有教唱歌嘅興趣班，包你唔會悶！

杜 半年啱？！你要掉低我半年呀？

杜爸 醫你嘅病要好多錢架，呢份 job 可以賺好多錢，你掛住我嘅可以打視像電話畀我㗎，年尾你生日之前我一定會返嚟同你過生日，到時買份大禮物畀你！